


PL  
2698  
.J82



v.3









(上闕)堂莫能仰視斯其純忠至孝原本天性天故所以曲成夫  
出處之大廣淵其氣全畀之以文字之權意蓋渺而微矣顧使先  
生十五年來役役長安道上則亦進思盡忠退思補過勤渠軍國  
之不暇夫安能出風入雅多而精精而新新不已以致天下後世  
知有一代之詩人文人如是假造物善忌自應與彼不與此已若  
夫福也口口口口口口口口口口口口口口口口口口口口口口  
口口口口口口口口口口口口口口口口口口口口口口口口口口  
冠三旬九食名不越戶庭歷兩饑歲而諷詠不輟咎譽兩絕者菰  
蘆中隕然唯一張子在耳故曰文章之美天地所甚珍惜也一朝  
之富貴利達視無殊馬牛通洞耳然而此中苦雋之味曷能輕以  
給人吾將願與海內有志者共鑽核而粥之也

崇禎十有五年閏十一月之上浣日夏口老門人張福乾書于秦  
淮之千佛招提





詠懷堂辛巳詩卷上

石巢阮大鍼集之著

門人齊惟藩价人較

壽黃郛白六十



司空仙派接初平丹嶂長聞叱石聲更羨龍媒能料敵遂令虎穴  
盡銷兵草堂星兆賢人駕麥飯香過考叔羹遙指天台雲外碧與  
君結伴採芝莖

壽楊侶秋七十

枝亭花氣晝陰陰寓客新栽杏滿林竹圃天晴長曬藥松房月出  
靜鳴琴班龍爭導藍輿帳黃鶴遙吹玉簫音歲歲吳塘僊鰈美一  
招元放醉行吟

壽蔣梅城七十

春江淑氣動蘭蓀花下爲君盡酒樽履道定知方栗里避人何必  
問桃源墨池人乞來禽帖鄴架兒供脉望殮若使東方諳此意肯  
辭蓬徑向金門

雪中懷小范瑤若

春雪日以大吟情君定深遙峯知炤酒清夜或酬琴市儉高魚值  
羅荒謝烏音此時非二仲何以懽寒林

答宗白見訊

夙有千峯約思之興不羣寒林當雪夜高諷每同君百衲縫山翠  
孤春響礪雲翻嫌晴樹裏禽語太紛紛  
雪徑稀人跡身心藉此閒緘詩來白社導夢入青山所願登豐稔  
兼之化梗頑經聲與竹色依舊滿禪關

懷任克家

野雪飛不已懷君靜掩關健當蠲百藥閒卽眺諸山春酒候方熟



林鶯唱欲還會須選芳樹分日共躋攀

寄楊瑞州君美

憶昔長干握手時石霜燈火炤敲詩別來屢隔千林夢世事何殊  
一局棋花夾印床行俗遠山圍訟閣放衙遲何期遙泛章江雪重  
對玄亭一問奇

寄璩武寧山甫

美人南浦靜鳴琴無改亭亭寒木心爲政定知馴野雉相思又復  
聽春禽時紛詎釋衣袂戒歛急尤需乳哺深近日主恩無次第平  
津高閣待登臨

寄懷傅寄菴相國

巖居何日不相思況是春雲暎浦時子夜問天應恤緯辛盤對客  
倘圍棋林閒海鶴巢書屋谿煖璜魚入釣絲安得短筇造高閣青  
燈細剪話心期

犢鼻蕭寒可奈何江村叩角且高歌烽嚴盾有長飛檄烟斷門無  
可設羅亂日青山抽思減衰年白髮綰愁多華予藉有匡廬月夜  
夜分暉到薜蘿

送沈郡丞含虛之石阡太守任

韋杜家聲著素絲一時歌誦滿江籬爭傳擊楫銷鯨浪依舊宣綸  
出鳳池剖竹遠詢槃瓠俗垂棠深蔭峴山碑野人遙指天童月相  
憶惟賡八詠詩

同吳儀之丘魯瞻方聖羽倪君符彭天錫集城西樓

泯泯春愁黯不醒朋來聊一破沉冥獨憐殘墅烟猶碧無恙隔江  
山自青信美誰能忘故土陸沉安敢問新亭與君且制憂時淚細  
數林花酒莫停

上已咸社初集菩提庵同鍾復鍾玉爾仁小范天錫瑤若克  
家損之止水宗白賦



林壑秉嘉尚詎爲時運移于野囑春雲芳艸念當滋樂志萃羣賢  
招我不我遺角巾就僧飯清論方瓊枝何用祓塵襟賴有松間颺  
荏苒憶疇曩慷慨傷今茲願言雲雷康刑措斂亦弛丞卿弼元化  
農扈罕靜辭將子飲美酒將子陳新詩山澤良悠悠斯盟不可渝  
送徐仲衡還湖口

莽莽風烟裏江鷗亦自羣情非潮所限夢與月難分盡醉酬身健  
高談略世紛如何歸棹急又欲撥春雲  
春深江艸色碧過石鐘山鳥影去胡極損聲啼正閒懸知還艸榻  
定復閉柴關好語匡廬月秋林與共攀

閱克家近詩

讀君新詩纔數過花下何處空香生晨囑微茫悟野色夕吟滴瀝  
偕泉鳴碎琴不顧市兒詫荷鍾聊適吾曹情春甕有酒如此碧不  
醉恐負黃鸝聲



述懷謝鄭中丞潛菴見枉

隼旟獵獵次蒿萊小徑從教白板開藉有鴟鴞網未雨遂令鷺鷥  
並殷雷村烟晚翠交蓄燒原草春青習翳媒如此昇平渾未減峴  
山能不念羊碑

窮巷高牙夢路通野心久已託冥鴻習池幸得陪山簡漢苑憑誰  
乞所忠綠浦布帆漁艇月青郊櫻帽酒旗風補天賴有明公在陽  
雨何曾負老農

用韻答中州游文學見投

擁腫聊存樗櫟年艸堂損鶴有因緣門迎謝諫閒中月杯泛陶公  
醉裏天炊釜自矜牛飯熟接輿空有鳳歌傳江城願得銷戎馬吾  
道經鋤亦自賢

時情蜀道未云難豈有修綸學釣磻春雨不堪愁裏聽江雲如向  
夢中看招鶯爛熳花千樹欵鶴蕭寒竹數竿楔後牛衣渾未解高

眠猶復侶袁安

晤吳予翮予采

離居夢屢到龍眠握手將君倍惘然歸燕幾家存聚落啼鶯何地  
不風烟已知婚宦俱成累未必漁樵可自全安得烽銷兼稅薄賣  
文沽酒度餘年

喜雨柬姚康伯

夢覺松窗聽雨聲老懷疏豁寐難成見龍特溥青田澤健犢平驅  
綠野畊分穫頗關羣盜喜汎舟不啓友邦爭定知稔穰秋雲裏銅  
雀啾啾次第鳴

柬廖將軍

聞君夙負封侯骨彭濮冠軍盛有名戟列繡旗朝角射帳開紅燭  
夜談兵麗魚中夕嚴鳴柝買犢千村看耦畊近日楚氛何突兀懸  
知劍氣正縱橫

臬使蔡香君見枉

中園灌木晝陰陰接葉喧聞黃鳥吟謀野幸存綿蕞侶出關徒滯  
採芝心鈴門柳細風全煖油幕梧高漏欲沉此際從公麾白羽習  
池何必羨登臨

製就岑牟學飯牛危時飲啄亦悠悠頗矜散木溝中置敢並枯桐  
爨下收較技棘門看戲馬省畊板屋聽鳴鳩一樽細剪山齋燭露  
白烟青話未休

柬戴廣文

四月江城艸木長苜蓿高齋甑正寒黃巾烽火亦何劇絳帳薪木  
聊自完往聽鷗聲用我法來尋犢鼻追清歡雙柑斗酒儲久矣寇  
熄與君相盤桓

同彭天錫損之阻風慈姥磯感賦

眠起篷窗日又西與君握手步長堤石尤屢日心俱折烽火沿江



望轉迷蒲葦池塘閒射鴨杏花籬落細呼雞安能結屋同高隱  
詳爲莊生註馬蹄

危城中彭天錫世兄見訪共住三月嚴解扁舟同下秣陵感  
賦

君來剝啄響巖扉艸色當門綠正微烽火極天同寓眺琴樽屢月  
頓忘歸危時高館聞鶯囀儉歲荒厨有鱸肥啼罷子規纔志別片  
帆江路又依依

古處微君孰與敦嚴城彈鋏共朝昏烽傳擊柝烏啼墅食盡張羅  
雀滿門白髮暗爲愁思長青山還有健身存擬從長蕩租魚屋烟  
水離離試釣痕

柬張損之

平生險阻傷心地盡子周旋握手時炎月任城荒店燭殘年淮海  
雪航卮綿田無改龍蛇火曠野交陳兕虎悲近日嚴城長作客梅

花芳艸憺吟詩

過眼雲霞十七年交情貞白各依然榮枯優孟場間劇坎止瞿塘  
峽裏船楚楚幽蘭香月露亭亭秋竹挺霜烟如今更擬辭禽向共  
爾高峯結數椽

送周相國挹齋入京

仲冬相國書招謝橋結夏

帝夢依依片野堂天書頻趣舍人裝沙堤首引端揆步玉案重沾  
內苑香身御卿雲籠屈軼手攜霖雨潤祥桑懸思溫室覘丰采憂  
國知公髯已霜

自公歸枕玉潭烟中外紛然羽檄傳司馬起居原重虜晉公劍履  
再朝天丹心獨啓金騰策黃耳平調玉鼎鉉袞職補完無寸闕九  
圍願覩太平年

平章未艾蚤懸車洸曲烟雲共卷舒莘樂頓幡三聘後芋香領取  
十年餘大農力艸寬租詔諸鎮齊飛報捷書是日功成懷辟穀赤

松來往百花廬

始春芳樹約同攀  
斗酒留髡興未闌  
快覩螭龍還帝闕  
幸留鴛鶴在家山  
棋聲竹塢如聞響  
展齒芝坪尙印斑  
欲假謝橋雲臥地  
野人代與護松關

逋客冥冥息影深  
寧憂繪繳到長林  
所虞朝著多堅壘  
勿恤神州有陸沉  
隨地孤寒爲引手  
何人吐握不歸心  
期公盡洗荆榛劫  
剩得青山與向禽

車笠平生約未違  
螢光亦近太陽飛  
公車長路衝冰雪  
官舍西山禮翠微  
衰鬢霜痕愁更滿  
晚年汐社去何依  
遙知東閣簪裾會  
應念岑牟老布衣

渡江訪史年翁蓋卿先生

結交四十載  
所閱匪一端  
各抱太古心  
要約胡絲寒  
植身並喬柯  
吐論逾幽蘭  
出處惟其時  
一以道自安  
念君謝塵黻  
高臥邢江干



素月炤書屋雜花浮漁竿長謠不知疲樽酒閒自殫一水隔芙蓉  
寒采何其難努力乘歸潮擊汰鳴風湍上堂陳蹠拜執手詳悲歡  
泠泠玉壺心相贈如可殮願言踰高霞使作鴈與鸞長揖禮松喬  
求授補腦丹倦憩若木枝饑食青琅玕紛紛濁世人腥腐何足觀  
東黃王屋王屋守汝南有聲左遷淮陽鹽官近遷岷藩左相

久賦嵇生絕于君殊未然交情歷冰雪夢路越風烟恥受一官累  
狂歌五柳前汪洋觀衆濁莞爾獨憐絃  
藉甚淮南治難磨月旦評歸然推表帥嗒爾拙逢迎道直青山在  
才高墨綬輕歸與賦松菊聊遂古人情

廣陵繁麗地鹽筴復之官秋水宦情薄春風旅袷單潮聲迎月至  
山色隔江看投牒無餘事閒琴亦可彈

又欲浮南楚聞猿過洞庭鄒枚齊遇合屈宋訪儀型湘浦芳蘅綠  
君山橘柚青漢文終有道恩已重滄溟

聞王梅和開府二東寄懷

江南棠樹繞春雲，  
影何能不憶君。  
是處神鰲資鼎奠，  
居然阜鶴動升聞。  
霖飛青社崇朝雨，  
風偃黃巾滿地氛。  
戎馬會銷封禪起，  
重拈七十二家文。

高牙雄嶽並嵯峨，  
伐石新標朱鷺茄。  
渤海定知修舂鍤，  
武城重見莞絃歌。  
將迎口馭臨三觀，  
疏瀹天恩沛九河。  
自笑無冠同貢禹，  
狂來顛倒着漁簑。

與史薰卿年翁雪浪居夜話

平生如夢歷悲歡，  
細雨挑燈約未寒。  
亂日羽書長警座，  
晚年汐社取加餐。  
人情久付齊諧恠，  
世事渾過蜀道難。  
但願烽銷禾黍熟，  
健身明月臥漁竿。

喜如園同年至召伯鎮同赴薰卿招

豈不憂雲漢其如良會難，  
口口口載酒適館復加餐。  
小雨簷花濕

深杯燭影殘所矜湖稅薄烏鬼繞漁竿  
瀨上浮家客孤帆歷夏雲來酣村舍酒同論少年文乃見交情古  
彌知世事紛野心兼逸氣幸不亂鷗羣

同如園蓋卿過史文學聖採館

結館臨河曲閉門花藥深湖香連晦朔秋水寓身心見月吐遙淑  
知君鳴素琴老夫牽率至隨意亦行吟  
書聲響荷稗知此有人家一徑入深柳空香聞野花垂帷理丘索  
抱膝閱繁華何必吹繁火高文即曙霞

柬鹿庵相國

賦就離居不問年片雲相望隔山川九仙骨抱還衣白萬卷書成  
自尙玄司馬堅碑無仆日蟄龍深抵入重泉閒來晞髮招山鬼吟  
遍秋潭橘柚煙

桴居樂聖近如何遙憶卿雲映雀羅新眷尙方傳賜幣故人沙路



復鳴珂定知月露難淹桂不藉風雷爲假禾貢禹王陽雙得路野  
心何必厭漁蓑

憂旱詩柬蓋卿如園同年

青簾白髮話窮愁黍臠曾無卒歲謀近海熱雲全類蜃報時靈雨  
不傳鳩賣文價苦長門賤彈鋏歌無幸舍留自哂步兵無長物惟  
餘犢鼻挂清秋

菀菀祥桑此一時農臣仰屋計何之一寒肘見黔非病七尺軀修  
朔苦饑自分野心銜石闕誰容愁鬢免霜絲與君擬學商山老結  
伴雲中掘紫芝

半兒曲

古樂府楊白花楊叛兒兩曲皆有取義茲更叛以半

者刺鮮終故半之也然世無白司馬矣半兒何罪焉

春風楊白花兩向參差吹年年吹花落不復吹上枝寧作楊白花  
莫學楊半兒

半兒秦淮倡生年十五六歌翻子夜塵舞映前溪綠秦淮遊冶郎  
夜夜倡樓宿

爺娘愛半兒有如大秦珠雕玉垂押簾宮錦箱韞瑜紅粉藝色殊  
謂是女中夫

若下黔將軍故是諸生曹家藏綠字書腰佩烏孫刀蹀躞紫騮馬  
拗折垂楊條

憐兒映花立目成不得語指顧蒼頭奴問兒誰家女稠桑巢野蠶  
絲多奈何許

繫馬櫻桃樹整步臨高堂文綺雙南金前爲阿母觴觴罷烏白啼  
攜手趨蘭房

蘭房燈如月釵頭見小蟾兒歌白團扇郎歌黃覃子共指華山畿  
願學雙雙死

半兒充小婦洗脫胭脂紅窈窕處香閣不異巫山峯下堦裙縫開

含噴罵春風

夫君矜意氣恥向畫眉老破鏡辭章臺自謂從軍好從此青閨月  
炤見沙場艸

沙場可憐蟲渡遼頭已白未鑄封侯印早作跼鵲謫十年瘴鄉還  
相視宛如客

傳聞虜騎入仗策去龍城制府轉戰死部曲欲何成歸來裏金瘡  
臥對秋風鳴

半兒當戶織下機理盤餐勸郎飲美酒一吸百甕乾富貴速狗烹  
不如牛衣寒

夫君謂半兒卿言識道理爲我縫春衣爲我蓄芳旨晴香朱雀橋  
明月莫愁水

朝飯甯藏牛暮切季鷹膾夜行疑石虎挽弓射之碎馳驟金陵都  
何有灞陵尉



自云求服食壽命凌千秋未謂鵬鳥來歲與龍蛇謀決絕無一言  
奄作岱宗遊

兒身如畫燭不敢整斜領青鸞白日灰黃鵠秋雲冷未樹女貞木  
變起綠珠井

椒圖築行館車馬何煌煌侑食邯鄲妓使作羽林郎爲語秦羅敷  
來充夜度娘

觀者無邊岸相憐淚如雨昔之驃騎妻給事平陽府口中銜薏苡  
那識蓮心苦

半兒自寬解賢豪如婦人婦人何所似譬彼陌上塵無心逐風花  
東西焉敢嗔

半兒抱琵琶過船何足云西山三尺土好葬石榴裙侍兒不自保  
太息黔將軍

用韻酬何蓉庵見懷

冶城吟眺約難寒無那卿雲掛釣竿避地豈能忘曲突故人煩與  
問加餐愁中見月難聞笛句裏含香不讓蘭尙有獻花巖上菊秋  
籬載酒與同看

關山月

明月升青海流光到玉門燕支秋尙淺大漠雪先屯虜騎方充斥  
男兒自報恩所嗟砧杵上終夜炤啼痕

紫騮馬

珠絡錦鞍鋪鳴鞭挾酒徒招搖秦氏女使作霍家奴巧學雙棲燕  
偷彈九子烏歸房薰宋鵲還熱博山爐

折楊柳

二月垂楊葉東風吹處生攀條馬嘶動飛絮妾心驚離別良有以  
躊躇空贈情如何正分手黃鳥試春聲

隴頭水

隴水東西流行人渡隴頭從來堪飲馬只解覓封侯月迴長傳思  
沙平不蔽愁那知聞裏夢夜夜到邊州

遙賦獻孺同年如園

屏跡向南晦知君心所存要欲耳目曠始識胸懷尊苟不課力作  
稼穡胡絲繁既念衣食足可以娛琴樽琴樽列中堂漁釣開前軒  
野水白如月數峯青映門好風原上來花藥香一村採菱泛極浦  
曝麥乘朝暾事已雜慮無默飲曾不喧細數籬樅落閒矚天雲翻  
日入衆鳥聒墟落煙復昏頽然臥藜床踵息亦以溫此意請獨抱  
莫與羲皇言

送周文學玉映北行

謝傅堦前蘭玉紛亭亭夕秀更無羣聲名騁騎曾何減筆札鸞箋  
未敢分省樹春池同咏嘯宮香大被想氤氲定知魚藻承恩後天  
酒榴花酌卯君



農臣謠

農臣無外慕力作春田中野老欣致詞云召荆谿公荆谿執政時  
驅虜如驅蠅年豐雨暘若百穀日以登孔耿背皇仁走險以登畔  
荆谿大發策游魂立冰渙是時寒燠調疾癘苦不作里胥罕呼門  
租稅緩而薄亦不起間架亦不算魚苗高烟廣澤間春風醉漁樵  
日月開九衢言官盡言責怒者救刑咎次亦免遷謫納言所敷奏  
曾無妄一男遙聞拜颺聲呼萬歲者三詔遣軍容使斜封莫及止  
勅尾押風霜手演防微語天官諮論道銓法繇三途祖制罔不遵  
人無僥倖圖都丞轉漕船如魚銜尾進屆秋抵大倉紅朽告餘剩  
黃巾起西北刻日發官軍區區魚腹雄大風掃殘雲公卿罕豚聲  
何況于艸野青青子衿士誰爲顧厨者外懼冀以釋九圍何安然  
轉眼成桑滄望此如堯天温旨召荆谿傳聞再三至帝眷匪虛隆  
待贊治平事野老致詞畢歌向春煙歸予亦望南山悠悠吟採薇

迎風策驢背大笑幾絕倒從來建太平只願君相好

梅花落

梅樹生道傍年年花葉新春風四面來飄如陌上塵烏銜歸上苑  
魚戲入通津獨有寒芳者看之淚滿巾

有所思

落日動遠浦明月開清池所感還復深脈脈中心知臨風激長笛  
上堂彈輕絃寧爲肆愉悅聊以寄相思

悲廣陵四首

寧作楊子潮莫作平山土潮去還復來土缺不可補揚州十萬戶  
掘土爲朝餐太守聞之傷心肝寸寸土寸寸皮爾曹乏食攘我爲

平山土

天乾河淺底見石召伯之魚過河泣銜索來告鯉與鰕漁戶府中  
催罪錢聽得賣兒復賣女明日大綱來打汝

召伯魚

沙田大麥熟沙田人家哭昨日府差坐大舸手持文書嚇殺我太  
守禁麥無作漿汝家屋內聞糟香汝刈麥汝釀酒縛汝府中見太  
守速炊冷竈烹雞豚黃金贈我我出門

沙田麥

玉鈎斜泣露花行人夜聽山鬼譁問鬼何所苦問鬼何所憂松門  
陰火長啾啾自言鬼多鬼亦餒府中日日催人來作鬼

玉鈎花

### 壽于文學母五十

三山江上似蓬瀛秋夜時聞鶴背笙曾見瑤池開廣宴更聞高館  
築懷清凌霜柏挺千尋翠浥露芝開九節莖旦夕于門過駟馬佳  
兒親御板輿行

### 東畢同年湖目

一官高諷秣陵雲但轍含香卽論文把釣每懷東海客聞笙遙禮  
大茅君庭閒春樹巢烏乳門靜秋花夕鳥紛獨羨茂先稱吏隱霜  
螯送酒對餘曛



憶昔慈恩解薛時如今年髮各如斯自矜野月歸漁艇笑閱宮雲  
冒戟枝久作逸民寧諱懶不官熱局未爲癡與君且酌長松下反  
覆閒看世上棋

柬杜大將軍弢武

輕車絕塞久縱橫破虜歸來不用名芳艸平原看獵騎寒燈高閣  
起書聲林中轍滿先生履花下絃調侍史笙遙望燕支秋色滿江  
潮猶帶角弓鳴

延州老將古名儒舞罷俞才便簡書列卒懸金多是鵲門生滌研  
不驚魚春星對酌山中酒秋野平乘下澤車爲報浣花谿上月不  
妨搖過步兵廬

柬趙掌科開吾

京兆蓮花幕裏香不妨曼倩此迴翔閒無塵事干高枕靜覺秋雲  
炤隱囊四面峯霞長入夢六朝宮月亦盈觴掖垣補袞聲名在重

見高梧集鳳凰

和壺中天壽容自卿

六朝多少青山對酒幾人無外慮爰園跳出利名場羈鎖幸能相  
恕紙帳蘆簾芸香蘭畹清福般般具脈望三餐未必神仙無妬  
常時採藥林中彈琴石上明月公然遇小山叢桂影婆娑不讓清  
光輕去六身年算浩劫恒沙臘指堦前樹更約天台租却桃花同  
住

輓李玄素

大星如斗墮丸丸變動清源白日寒矐次已知還浩氣樞中誰與  
建高壇板輿天路依潘岳食案雲中奉伯鸞天付一門慈孝節世  
人空作壑舟看

玄素太夫人及元配俱相繼物

松筠閣畔盤桓地憂國長嗟髀肉生客至中宵陳大斗人推五字  
敵長城令威不返摩雲鶴供奉長騎捉月鯨帝所定知仍緩帶層

宵飛下雅歌聲

輓黃王屋

邢州誰是魯靈光才具推君獨擅場詩思並如千頃濶山樽長帶  
百泉香逢迎不慣稱能吏任率居然肖古狂灑淚試看垂絕語修  
文好去白雲鄉

深約秦淮把釣綸如何桑扈遽還眞應知供奉鯨飛日媿盡曹蜍  
貉瞰人掛劍淚零苦次土夢楹淒動總帷塵傳經幸有佳兒在不  
藉優伶起負薪

吳長卿刻書南中遭火焚行李都盡將理歸裝小詩感賦

閉門涼雨艸蕭蕭清論煩君破鬱陶賣賦金憐垂手散著書帙約  
等身高時危愚不謀雞肋歲儉貧猶市蟹螯更擬鳴夷遙載酒布  
帆同泛廣陵濤

夙附聲華冠二京于今白髮各縱橫胡琴恥爲織兒碎薪火難磨



作者名桃葉渡花鳴夜雨要離塚樹起秋聲與君倚醉睨千古話  
到疎鐘動石城

月下同卜子寧潘江如集池上

月吐羣務息軒池生靜涼同心敦野酌偶影向清光坐久沾松翠  
譚深雜芟香天機彌眺聽吾亦省吾狂

同劉中丞蓼生赴思皇吏部招集秦淮小閣感賦

白石牛歌枉用長時情只合檐銜觴荳花籬畔聽秋雨荷芰聲中  
遞晚香新論欲從中壘授咏懷不諱步兵狂與君小築長干圃無  
力能營八百桑

壽錢宗伯牧齋六十

拂水流雲細有聲藥壺駐景夜長清浮榮薄視魚鬚笏凡響平聽  
鶴背笙弟子芬陀皆品列文章黍米已丹成礪谿不待頭垂白早  
爲投竿答聖明

虞山露下紫莢香好採秋英實絳囊火撥懶殘新櫓拙風傳弘景  
舊松篁合修淨土龐居士高枕爐峯白侍郎只恐世緣應了取莫  
將煙火祝平章

壽張崑崗八十

高隱秦淮結大年藥房竹塢自安禪飯僧每爨雕胡米漱齒長持  
內景篇露湛三珠庭畔樹香生九品樂邦蓮沃洲莫買人知處黃  
鶴期君控紫煙

壽徐慶卿表弟五十

瞻竹堂前春艸深昔時笑謔動棲禽公然素雪標衰髮尚有青山  
帶古心騎鶴客來傳妙藥叩魚僧梵響空林思君遙餽松花酒黃  
葉秋烟未易尋

送方宮諭坦庵冊封入楚

驛路蒼山外秋雲擁傳生蜚鴻遵大澤戎馬近方城備述宸衷苦

無言使職輕南樓逢舊月莫效庾公情

雞犬桃花處甘棠芾並垂采風見先澤灑淚寄高祠春苑陳金鏡

秋原攬轡絲恩榮值歸鶴一解九京頤

坦庵尊人閣卿先生  
司理常德有遺愛

海門霜滿樹知子繫歸舟鄉歲長嗟儉軍書正備秋倘過竹林地  
定動黍離愁縱是懷陵谷終成萬里遊

金陵籬下菊繞盞酒俱香無恙惟貧健相遲作古狂蘭移湘畹露  
橘飽洞庭霜持作幽人贈靈芬意不忘

送張總憲華東以奏績行時有三鶴來儀之祥

佳氣秋清仗外峯帝臣奏績更呼嵩戎機未息華陽馬民瘼爭蜚  
澤畔鴻一代衣冠瓜蔓抱四方杼軸繭絲空須公魚藻賓門會次  
第敷陳到聖聰

岱嶽秋雲擁傳生遙瞻曳履入承明補天一試山龍手警露三聞  
子鶴鳴太液金衣晴暖藻青城玄羽夜流聲懸知辟穀功成日整



背來迎月滿笙

寄建德令李樵懷

江上遙聞假邑絃山城猶得見堯天  
懸魚庭有高松月臥犢村綿  
野樹煙不忝戴星長抱牘爭傳飲水亦投錢  
何期適館濃花裏秋水冰壺對皎然

雨後喻司馬心拙過訪偶成

秋林積雨報新晴高駕城南問友生  
自是浣花谿畔侶不忘邀簞  
步閒情時名詎敵鱸魚味山夢無嫌野鶴聲  
獨是軍書兼斂檄倉皇欲問漢公卿

標柱東南海霧消正資元老在中朝  
久知直道侔孤鳳何恤讒言  
有洮蜩雪嶺晴嵐通眺聽巴山夜雨話漁樵  
知君世有玄成業伯仲雙題駟馬橋

青谿訪曾波臣徵君偶成

如何塵市裏一曲隱花蒲野水靜相照人煙渾欲無谿禽掠紅果  
夜蛤吹青菰但熟山廚酒閒隣亦可呼

染毫施法後隱几獨能閒槌磬響秋雨杖藜看晚山放神雲鶴表  
夷跡渚鷗間偶縱青溪步逢君洗藥還

送畢湖目開憲徐淮

風烟連兗豫控以古徐州式畫熊車往平銷鼠竊憂繭絲寬赤地  
刁斗肅清秋一嘯閒麾羽長河月滿樓

戎旃逢暇日乘興莫忘詩河煖冰開處山晴花發時粉香關盼宅  
黃石子房祠但酌春風酒于君倍有思

柬金雙南同年

十九年來行路難相逢何處道悲懽素心元恥謀偕世直道誰能  
不左官鴉背斜陽猶六代雞鳴白露滿長干與君閒對秋籬菊小  
酌鱸魚興未殘

寄邵僧彌

班荆懷往歲縱目滿烟霜別後逢佳日茲情殊未忘報吟山葉細  
領夢露花香此際啼秋鴈君應念古狂  
憶子垂帷處遙峯對酒明危巢孤鶻語寒艸百蟲聲若是翻書暇  
能忘徙藥情半塘斜照路步步野雲生

送吳司成駿公還吳北上

高帆別路繞菰蒲酒盡秋山翠可呼刻日帝屏登姓字如雲祖帳  
滿生徒誰能徧地銷戎馬何處違山無蟪蛄此際蒼生思轉迫楸  
枰莫戀謝公娛

秋花籬落晝長關高駕遙來問小山正是絳紗勤設教欣聞玉笋  
近還班收將樸棧楨王室說到瘡痍動聖顏袞職夔龍無寸闕野  
心農圃賴君閒

送黃父母位兩應召北上



秋村棠蔭尙森森臥轍提壺動野吟  
百里牛羊求牧法八年烏鵲護巢心  
孤城烽至親傳柝敵甌塵懸不廢琴  
聽說凌霄雙鳥舉鵲衣鶴髮淚霑襟

碩儒帝正藉嘉謨直行瞻據省梧爲政作霖敷  
槁壤居心如月映冰壺狐鳴四野氛難靖  
魚鼈三星瘼未蘇願得兵銷兼歛薄可無召杜伏青蒲

馮金吾本卿于城東築館花藥楚楚圖書盈室樂而賦之

小築青門曲翛然存野心六根歸竹石五嶽峙書琴  
舞獻清池鶴音羅密樹禽公餘來拄笏何必謝華簪

艸閣緣花立登之看遠山野雲何歷歷飛鳥甚閒閒  
猿嘯高巖上鴉歸落炤間解衣對樽酒吾亦憺忘還

良夜無塵事婆娑試倚樓如何東海月亦炤白門  
秋露白蒹葭潤巖青桂樹幽吳歛翻子夜于此散鄉愁

高齋多衆籟雜以百蟲聲君向秋花立不眠無限情銀燈斜照酒  
翠袖細調箏忽忽啼烏白何嫌北斗橫

卜子寧寓青谿貧甚將爲楚遊柬之

旅夢欲何托秋谿雲甚深知君不得意倚樹聽鳴禽子舍蒼山路  
孤燈黃葉心濁醪閒自撫不獨爲貧吟

羣嶽軍烽滿應知禽向稀始徵逢世苦詎悔讀書非寒屨斂深竹  
山筐拾舊薇野夫春瓮碧整興待君歸

寄史中丞道隣

野人訪菊向東臯歡動秋江八月濤重起鄮侯通轉運居然汾國  
制戎輶鷗迎瓠子安流檣犢賣長淮古戍刀補石正當天缺處東  
南何地不漁樵

運甓翻書尺五天布袍蔬食甚蕭然清風孤竹燕山石遺愛甘棠  
皖浦烟羣吏傳聞鞭害馬孤軍曾憶跼飛鳶至今釜底諸殘孽嚙

指爲公騎不前

寄林中丞澹生

高秋秋色滿瀟湘  
桂闕榕陰引思長  
荒服夷多歸版籍  
故人勛已勒旂常  
開樽油幕花如霧  
較技鈴門戟有霜  
訟牒軍書齊報罷  
猺邨何地不畊桑  
小隱青谿謝俗氛  
菰香橘熟每懷君  
書經鉛鋹潭邊月  
夢入湘山寺裏雲  
紅實椒花何爛熳  
碧漿椰酒亦氤氲  
遙知八桂婆娑處  
定有雙魚報鹿羣

寄何方伯太瀛

鍾山滿目翠氤氲  
對酒秋籬一憶君  
月桂自存冰署色  
露棠全灑瘴鄉氛  
征徭大府頻加斂  
烽火甘泉狎報紛  
此際經綸需鉅手  
可容閒眺百蠻雲

和徐州來韻兼憶其尊公罔卿



秋田烟漠漠太息有農臣歲儉鮮安土時危存健身所嗟喧厯世  
絕少靜和人每過喬松館幽芳獨爾親

閒林逢積雨吾友感何深月晦班荆地山寒挂劍心詩書誰爲沒  
弓冶正堪尋不盡西州慟登堂覩素琴

如此飛揚俗無如却軌尊過君下帷處澹古類秋村刷羽翔孤鳳  
安心學定猿燈青松露白高諷向中園

寄壽傅相國寄庵六十

高巖清夢枕秋雲樂聖翛然謝俗氛黃葉聲寒尋嬾瓚白蓮香淨  
禮匡君風塵不雜鱸魚味寵辱難驚野鶴羣此際平津陳大斗江  
楓籬菊炤餘醺

齒讓礪谿二十年後車旣載更其旋鑑湖堅乞滄洲月酉叟同炊  
紫岫烟綵蝶應圖穿幕裏青猿化石侍花前懸知舊夢懷東袞緋  
玉重看絳九僊

壽俞容翁七十

松籟秋高細可聽至人于此寄沉冥  
羣瞻柱下猶龍氣親註浮丘  
相鶴經醉裏攢眉辭白社客來攜手入玄亭  
閒時更倚斜川閣指點三茅一片青

漆園聊可喻行藏末俗誰能並古狂  
養母羹曾遺考叔答賓諱不讓東方  
紫萸細釀中山酒白石閒春五嶽糧  
我欲餉翁無長物桃花飯煮洞雲香

送禮普陀者北還

江晴楓葉下紛紛細酌茱萸一送君  
舟過廣陵濤正壯途瞻岱嶽翠難分  
觚稜儀鳳調雙管刀尺盤龍進五紋  
此際呼嵩陳所見白衣親現補陀雲

寄懷張司農繩海

極目晴江上青青見楚山水雲徒爾闊  
烽火幾時閒搜粟三空日

持籌百戰間知君映叢菊憂國鬢全斑

莫讀靈均賦離憂未可收故人長隔絕近緒轉窮愁露抑芳蘅氣  
洲香橘柚秋何當跨黃鶴醉月庾公樓

壽朱中丞明經七十

海陵香雨長青芝高枕山蓀夢不疑從者桃椎編艸屨閒中弘景  
品松颺丹成學辟留侯穀柯爛難拋謝傅棋欲採菊華釀仙醞東  
籬選取傲霜枝

懷范璽卿太蒙

石頭鮭菜引歸船別後停雲憶遠天月滿華鯨乘廣汐秋深黃鶴  
縱高烟五山隱處瞻松赤三徑人來問艸玄對酒茱萸無恙否臨  
風遙祝大椿年

懷季吏部因是

秋聲遙動廣陵濤此際懷人更鬱陶青女寒霜盈橘柚白門小築



隱蓬蒿步兵托諷惟飛鸞吏部歡持有舊螯安得登臺同采菊江  
天醉指鴈痕高

過徐州來館

高談響秋樹此意亦何閒相與研名理何殊入遠山微涼生竹路  
返炤下柴關爲愛昏烟翠夷猶未忍還

喜集生中丞還潭上

秋水烟生處蒼然聽暮鐘定知白蕩老重印雪泥蹤法眼開羣象  
冥心住一峯寒潭聞落木于此亦無窮

坐臥天花下都無婚宦情觀心飛鳥處數息百蟲聲何自塵機入  
湛然空水明幾時對黃葉趺坐叩無生

再和容翁壺中天

古今一覺邯鄲誰人不作千年慮無情半面小秦豈白髮幾曾經  
恕黃紙除書紅綾宴餅總是盤伶具囑付彩毫莫惹山靈閒妬

爰園鶴乳松巢龜遊蓮葉更有班龍相遇秋空一片步虛聲莫是  
飛仙來去五架茆堂數溝竹瓦廣種青門樹留却半間典與蓬萊  
雲住

宿慈湖蔡氏館損之後至

不宿青山諾知君銜遠心高談坐野館微月寓空林石竹吟風細  
秋燈炤酒深今宵塵雜夢知不到幽岑

離離黃葉下睇笑滿柴關不作鯉魚鬪同爲野鶴閒燈青繁露地  
月白女蘿間寂寂懷山鬼烟深未可攀

過采石望李供奉祠

山川何寂寞文藻亦荒涼藉有高人蹟能延衆木香江聲寒古瓦  
空翠飲文梁笑酌兵厨酒惟君預我狂

宮錦袍間月還來炤舊祠青山秋欲盡白也醉何知竹染湘妃淚  
松吟山鬼辭江雲來復往夢路寄相思

殘碑立秋艸何異夜郎西應月潮偏響銜峯日易低葉繁山鼠竄  
烟暝竹雞啼此際逢搖落予情亦以迷

八表翔雲鶴徘徊戀此峯烟綿漁浦翠燒愛野田紅川嶽含元氣  
衣冠帶古風欣予托甥館歷落繼高蹤

與謝少司馬苧蘿曹元甫飲感賦

攜手從君擘菊英葛巾藜杖野雲生蟹螯自對林間酒雞肋閒看  
世上名廣武風烟存艸色北邙霜露領松聲遽期結屋青山坳抱  
犢呼兒帶雨耕

時事文楸一局棋不堪柯爛野樵知陰陽失序麒麟鬪艸木無靈  
鳳鳥饑屢月白登圍瀚海十年赤羽塞潢池農臣敢作憂天夢種  
藥山雲繞接籬

送柯孤石父母北行

蘆白楓青鴈有聲爲看雙鳥入承明司玄洞口冰壺月天柱峯頭



碧海笙赤子長號攀去轍黃巾嚙指懾威名此行溫室承天語前  
席何妨紹賈生

柬鄭太守楚石

姑谿風物尙繁華鴻鴈天高菊有花中野穡車鳴晚徑深村酒望  
有人家射鳬獵獵風鳴樹捕蟹星星月印沙聽說清和賢太守斑  
爛獻壽在高衙

九日曹梁甫招遊姑谿

欲暮谿烟動秋峯未可攀孤舟隨意泊野興亦能閒盡醉菰蒲曲  
聞香橘柚間浩歌出漁浦明月炤青山

遙念江村俗秋田競飯牛一身遽漂泊九日轉離憂既賭莢房酒  
還操蓮葉舟因君敦雅尙搖落頓無愁

秋杪林仁甫招同苧蘿司馬根遂勳卿集黃山別館

小雨江郊起澹陰同人野館事招尋藤花秋盡看除架艸閣閒登

好弄琴背郭已無湫溷氣銜觴兼豁鬱陶心高談細細村烟動歸  
唱牛歌出石林

徐直指心章招同根遂同年集陶氏園時正有衡文之命

西園征蓋動秋香遙築岑牟近皂囊高酌紫萸能送酒小山青桂  
不驚霜層霄健翮摩鷹隼阿閣和鳴兆鳳皇自是澄清多暇日野  
人閒得咏滄浪

霜威久肅鸛鵲軍籲俊天書屬惠文幽谷蕙蘭爭入珮天閑雲錦  
定成羣千尋松挂蛟門月五色芝擎雪竇雲遙憶絳紗高坐處天  
香玉露正紛紛

謝彭比部羲何見招

籬間木落見山青對酒誰能賦獨醒小艸于人何繫束高花插髻  
且沉冥天晴鴈影過衡嶽月靜猿啼滿洞庭歸臥偏思乘傳地秋  
窗細細註騷經

剖竹聲名著素絲含香譽冠白雲司妬人子正如吹蠱射影盃還  
動委蛇水落潮痕開海月秋深露氣集江籬會須宣室垂清問莫  
作蕭條鵬鳥悲

壽鄭郡伯楚石太翁六十

秋空高唱步虛詞遙望西樵進酒卮丹藥駐年鳩更祝瑤笙吹月  
鶴爭隨露升滄海珠開夜香滿羅浮花發時此際不煩重置驛羣  
仙來往定無期

青山處處聽歌聲郡閣高開海日明杖是龍騰投葛稚石聞羊起  
叱初平官厨行餽梅花酒洞籙新填叢桂名奏罷鶴飛何以獻天  
台舊有紫芝莖

聞楊中丞忠吾閱水兵江上賦寄

江上樓船訓水犀山青兩岸炤旌旗遙知楫擊秋空夜正是氛消  
露布時強弩射潮魚眼避高帆掠月鴈飛遲野人載菊閒搖櫓來



往鷗羣幸不疑

送姚少參心甫入楚

晴江驛路指秋霞  
鏡吹悠悠靜不譁  
月下弄珠逢漢女  
風前繞食聽神鴉  
霜嚴軍壘生荒艸  
雨足蠻村種土花  
遙憶吏民延見後  
木奴千樹臥高衙

楚山秋翠入烟霜  
極目征帆引思長  
露白猿聲接巫峽  
天青鴈影度瀟湘  
包茅好去詢新貢  
離黍寧堪問故鄉  
何日登樓來作賦  
鳳歌一效古人狂

寄懷周澧州彝仲

江臯白露正團圓  
公子遙思綰澧蘭  
兩地共看秋夜月  
一官高寄水雲端  
心閒不羨鱸魚味  
道直無憂鵬鳥翰  
旦夕子雲勞執戟  
刀州何必更彈冠

橘柚烟圍訟閣深  
巴山積翠待鳴琴  
秋高定轉溟鯤鬣  
酒後空爲

楚鳳吟細雨魚蠻喧蓼浦晴田犢牧臥花陰何時叔黨偕清話一  
聽湘靈鼓瑟音

姑谿同王龍光對酌

載酒登高興已闌君來重整遠遊冠扶筇遙對青山笑採菊能尋  
處士歡世味悟知渾食蓼名場數却幾加餐何如放棹姑溪曲日  
日鱸魚挂釣竿

同鍾黃門象台再汎姑谿時聞象台召赴直省

谿上秋無改從君幾度遊涼風醒野酌暝色起滄洲細聽喧烟鳥  
閒觀浴浪鷗山青明滅處容易動猿愁

近日徵書下期君直省廬爭看鳴大鳳切莫戀鱸魚徧地蘇徭困  
彌天祝網疎匡時煩力諍予只臥樵漁

懷周大參慕乾

秋風吹鴈歷江雲極目蒹葭一憶君同舍徵歡長命奔退朝乘興

卽論文世情別後桑田改衰髻看來柳絮紛好待桃花淮水發木  
蘭載酒狎鷗羣

謝吳當塗青嶽招飲

雨後繁暄歇秋花一縣香知君清且惠善教及江鄉夕浦漁烟翠  
霜塍犢艸黃春來養蠶女陌陌試條桑

曾漱清源水寒情動旅吟觀君爲政好宛抱石泉心野月碧盈案  
江峯青待琴還於叢菊下宴客一披襟

柬梅無華

白門高柳曳寒烟憶爾蕭條坐一氈國子齋惟空井竈都官家有  
舊詩篇玄暉閣畔鳴秋雨供奉祠前濕墓田予亦子山同寂寞江  
關詞賦正相憐

張兆蘇移酌根遂宅時謝司馬苧蘿湯爾胄在坐

涼雨滴秋樹客心爲灑然好乘菊健日盡興鴈來天深飲秉華燭



高談破暝烟梁塵迎曲動細細落樽前  
停雲思胡極良友復能來但有樽中好寧殊逕自開香聲喧橘柚  
星氣滿蒿萊爲報庾開府江南未可哀

送謝少司馬苧蘿還白下

青山同作客又復問扁舟擊汰下牛渚登高還鳳遊孤帆載秋雨  
繁露繞江洲驥子能懷橘相攜憫旅愁

晚泊烟靄處汀寒聞鴈呼吾生長道路卷跡且江湖野樹啼烏白  
天霜醉木奴白門墩畔月載酒細相娛

謝程廣文颺伯見招

秋雨鳴不已山雲更沉沉感君念搖落樽酒事招尋徑入枯荷沼  
簷圍繁橘陰婆娑懷幼志一放楚臣吟

黃海雲無際君家近此峯宦情存苜蓿鄉夢切芙蓉山夜月如燭  
春谿水自春傳經何日暇爲導遠遊筇

有所思

天香露濕月輪高  
南嶽夫人聽海潮  
囑罷侍兒收白兔  
丹唇指點學吹簫

祈年禮斗掃星壇  
小苑燒燈炤紫蘭  
却立鈎簾還未出  
低回自整九華冠

晴簷語鳥寂無譁  
叩齒焚香諷法華  
紅豆記完諸佛號  
輕彈玉指散天花

秋窗縛竹拭香塵  
露滴蓮花滿硯身  
筠管拈來臨賦帖  
兒前生是雒川人

壽徐衡陽六十

神翁紫髯太飄搖  
白鹿平騎過板橋  
石上洞仙長賭弈  
月中嬴女善吹簫  
閒從僧社持蓮梵  
賜有公田種藥苗  
聞說秦時浮島客  
桃花消息待春潮

聞關門警

八月遼河已合冰錦州城外虜層層人中傀儡無邊岼誰奪燕支  
解白登

紅藟青芻飼橐駝關門月夜虜笳多邊兒瘦盡封侯骨還報漕船  
未過河

鍬甲凝霜蓄馬腥邊頭百戰骨丁零胡雛笑飲葡萄酒醉上高原  
放海青

送楊錦仙父母應召北上

七年羅雀掩山城烽隙龍眠尙勸耕濯錦谿流同灌溉峨嵋峯雪  
並孤清備嘗苦趣如餐蓼閒看時情侶著枰聞說至尊重廉吏高  
梧春掖待遷鶯

送繡頭長老禮峩眉

威儀孤竹挂寒烟槌磬持珠自了緣秋樹吟風馮數息石窗吐月



炤安禪猿啼露白雙帆外鳥道霞青片衲前此去高峯懷夜坐當  
龕葉葉聖燈懸

柬根遂同年

逸麗翩翩賦長卿香名取贈石榴裙花濃月淺相呼處此事于君  
太有勳

綵雲漏地乍飛來維浦巫山定不猜人面桃花相似得采真曾不  
問天台

散徧天香倦欲休倚牀不卸鳳釵頭醒來起漱梅花水自送簫聲  
出玉樓

芙蓉秋水弄朝姿寸管調螺畫翠眉却笑扁舟五湖客館娃殘月  
炤鷗夷

寄王石雲

十月金陵楓色寒憶君建隼楚雲端荆人盡革於菟俗使者居然

獬豸冠烟淨君山霜下竹露滋夢澤晚中蘭何時作賦酬鸚鵡細  
向南樓縱古歡

故國蕭條不可思農臣無路策安危師中未築鯨鯢觀澤畔長銜  
鴻鴈悲炊斷露花垂古井人殘野葛冒荒籬胡奴仁祖俱寥邈拮  
拾將酬季女饑

送楊爾台之慶元省親

送君偃邑侍鳴琴酒盡青山欲暮情計日郵程超鴈路過江客夢  
入猿聲烟青苦竹沿村暗月白梅花繞署生此際趨庭無雜事太  
玄細與註爰清

寄潘文學江如

極目寒空見鴈飛思君黃葉繞巖扉潮鳴野浦楓俱響雨過江城  
菊又稀圃架盡除通鶴路霜燈相照補牛衣村晴未臘梅牕發乘  
興還來歷翠微

詠懷堂辛巳詩卷下

石巢阮大鍼集之著

門人錢二若次倩較

同根遂同年叔遠損之烈卿肅應梁甫拜供奉墓祠還止叔

遠叢桂山房小飲

雨止天氣正庭竹飄涼煙仰矚無寸雲高興何蒼然曳杖出城市  
放歌響平田曉月輪未沒青山當我前茲山臥谿上雲霞高且鮮  
仙人偶寓託永謝區中緣松花釀春酒醉理中山眠夢中發浩笑  
塚樹何連綿至人足神理壽命非所先歸鶴無乃愚山鬼誠足賢  
大笑問終古夫子何亭亭盡醉山月白狂謠海烟青騎烝自來去  
麾手辭天刑世人昧遠覽誤謂收星精陰霞抑嵩華夜景搖滄溟  
松風空際來飄然聞流鈴玉女隔谿笑手抱山海經丹唇噴香雨



翠翮冲雲屏窈窕不可求薜路蒼冥冥

高士懷遠情結搆青山趾花木稟和氣寒月養芳綺雞鳴紅藥外  
狼嘯蒼谿裏吟從桂峂開琴向松門起旣畊亦以讀愛此土風美  
誓當剪茆茨相從釣谿水飯牛春艸香放鶴秋烟紫朝昏禮翠微  
無爲市朝隱

禮青山還途中再賦

烟澹霜輕草不迷同人覽古有招攜偶然海月留纖影遂指仙靈  
有定栖山鷗鵠啼荒樹外木芙蓉發野塘西誰當重滌華清硯濃  
豔凝香與共題

供奉乘流去不還長留詩賦炤江關墓田犢臥寒香處祠屋鴉歸  
晚燒間樽酒幾時辭碧月瓣香此日禮青山憐予歷落渾相似雙  
屐孤藤亦自閒

同根遂過城南菴菴僧若影汲桃花泉煮茗

日暮谿水綠平楚亦蒼然遙聞槌磬聲旋憇香林前一龕納空翠  
拂拂青山烟雪乳傳素瓷茗味冽且鮮上人向予笑謂是桃花泉  
湫流貫石骨噴沫凌通川連飲破五濁孤爽如秋蟬憶昔游鈞突  
漱齒逢冰天歸臥高巖雲去此垂廿年茲復酌澄潔彌覺身心便  
禪悅何其腴雜慮亦以蠲誓當犯毘尼露竊香中蓮

寄祝倪玄度六十

石頭高步望龍眠目送飛鴻御五絃花水秦人何諱隱榆星太史  
定占賢寧馨兒並龍媒駕狡獪姑揮鳥爪鞭青桂紅蘭隨采拾莫  
將清閼讓神仙

年少懷君坦腹時風鳶竹馬各忘疲何知霜雪盈顛日又是烽烟  
極日期桃瓣細炊仙史鮓松花閒覆洞門棋石蓮浮渡渾無恙好  
挾瑤笙月下吹

同叔遠兆蘇飲謝氏萃園

孤亭類寒色烟盡見諸山偶就蒼苔坐高談黃葉間野田聞雁噪  
夕炤數鴉還攘攘悲人世吾生何太閒

青山澹無恙古處可爲鄰樽酒笑相眎高峯畢此身遙憐嵐彩細  
私念土風淳便擬依叢桂婆婆挂葛巾

坐漁山堂展蘇米諸名家竟日柬謝元甫同年

吾子藐姑人能不厭塵壚卽爲九州有冰雪意無鑿孤霞峙江表  
英辭振羣嶽天開河雒文斯人藉評駁蚤悟損益旨冥蜚入寥廓  
歸葺漁山堂書聲響深壑桃花送烟水青山挂籬落養福守寒儉  
和光務恬泊乃其結習存黃金事揮霍窮年辨蝌蚪傾囊買丘索  
予向不爲然鼠璞愼其錯茲來坐秋雨牙籤縱捫摸海嶽品紙書  
坡老宸奎閣觸目飛雲嵐諦眎辨芒角神虬舞長川冰蠶織叢箔  
摩娑至張燈意飫神逾愕始悔昔者言將無類鳩鸞珠母與空青  
曠世而一作此氣干象緯年代非所約君亦自珍重夫豈拾糟粕



放言問漁山一笑海天闊

兆蘇見招同根遂同年步谿上旋過檀度菴便還兆蘇館小  
飲

坦坦步谿上青山澹我心微風木葉下薄暮野烟深水靜鳥還渡  
蔬繁蟲自吟塵情兼客思銷在晚鐘音

蟹螯堪屢給傍舍近漁蠻叢桂岬無恙浣花谿甚閒醉馮簷際樹  
笑看門前山暝色已如此頽然猶未還

寄張儀明臬使

麋城烽羽莫縱橫噲蜀新聞屬長卿兕革連營歌杕杜馬蹄沿路  
長芳蘅九嶷雪盡歸鴻度三戶春深布穀鳴爲問平淮碑版上枯  
毫可許頌金聲

寄冒嵩少臬使

青谿對酒此何時別後烽烟不可知近日麋城開幕府傳聞駭喙

避旌旗桃花崦曲詢秦俗湘竹煙中頌楚詞  
好待漢江春水綠登樓來賦詠懷詩

游青山還將下金陵柬謝郡伯鄭楚石令君吳青嶽并乞葺  
供奉祠垣

谿上煙含樹樹棠江鷗野客共廻翔官厨不置胡奴米幸舍長傳  
列子漿壑定魚龍閒睎月天高鴻雁細排霜茲游最是攄懷事特  
祝青山一瓣香

霞細松寒山鳥鳴高祠風景似平生邨空夜送敲砧響地煖晴看  
負耒畊雀粟覆車呼不擾魚鹽入市值都平仙人鯨背應酣笑爲  
政無如此地清

山桂青青笑不言天風無朕海雲寬世人置眼多鷄鶩之子遺身  
已鳳鸞夜夜月華生白亭年年春雨浴紅蘭紛吾脫略能相許只  
作蘇門嘯答看

移文曾不費招呼高屐輕藤手自扶山半炊煙能暎帶隴西香火  
未荒蕪孤亭碧葉喧松鼠十月青霜貫木奴尙有向南垣土缺編  
筠樹槿待枝梧

用韻答孔文麟

門寒不過魏其侯水落霜酣釣未收托志尙平寧諱健攜家陶岷  
可稱浮披裘不結懷金夢衣繡全蠲入廟憂蒿下啾啾吾老矣看  
君六翮御高秋

謝太白先生靈響相聞

琅玕竹實飼青鸞君往求之生羽翰春水有香江月醒高霞無語  
海峯寒盡窮帝所修文樂長笑人間行路難此夜精靈相遇合流  
鈴玉露共珊瑚

碧月青天自古今寒光搖筆動幽岑玉壺浮蟻仙人館清夜驚鴻  
古調琴石籟虛徐傳桂峴天花合散在松陰願將潮汐盈虛旨一



印文人未死心

觀吳匏菴題種竹卷用韻作歌呈元甫同年

漿礮老紙不盈束展之可以破煩溽韞櫝長鳴風雨聲仰函一片  
瀟湘綠洋州後賢工丹青不寫洋州實當谷爲愛匏菴種竹詩盡  
括檀欒入圖籙作詩者意意云何夢到江南煙水曲塵沙不耐紫  
衢腥蹴躡翻嫌玉堂俗漁山草聖不自聖日費青蚨買籤軸端居  
久乘太常齋泊手恥割東方肉敏求好古獨不衰得之若驚失如  
辱墨海平隨渴驥轟芸閣嚴防蠹魚觸國朝李孟待匏菴謂學眉  
山得其骨此卷琅琅歌此君胸中之情并奇突毫枯槎角未能無  
興至騫騰猶悲局與予指點觀且吟高軒老樹風簌簌憶予昔者  
硬索觀如曝秋衣何篤碌鹵莽過於赴壑蛇孟浪居然破轅轅茲  
來雨臥遙集堂夢子投予以虎僕覺來筆法小有悟始笑平生眼  
如粟雞黍林中不待招遽爾摩娑逾信宿臨岐心眼何茫然如武

陵魚別秦服幸不論衡作秘藏當共離騷成熟讀歸賣南湖百子  
田來傍漁山結茆屋

聞徐六岳上公領留後事志喜

鼎奠繇來重兩都深資元老佐鴻謨奎躔人共瞻星斗麟閣家傳  
有畫圖不治私居同鄴國無虞左衽比夷吾聞公留後陪京日野  
叟山童亦快呼

寧澹長懷鎮俗情谷王謙受亦何盈君恩從未忘餐飯民力常思  
減稅征三絕雞林爭購繕百城烏篆亦縱橫所期四海烽俱息讌  
息從公咏太平

懷周玉森

玉潭寒月白如霜夢路懷人此際長竹素閒翻千古墨梅花高臥  
一林香春鶯鳴和存交道野鶴風神類古狂好待莫愁湖草碧與  
君修禊共銜觴

幽夢中宵越薜蘿爲懷良友在鳴珂四夷共輯明堂玉萬國重含  
大酺和鉅手有人扶日月閒身將子釣烟波桃花石雪知無恙穀  
雨來聽摘茗歌

感懷

江田無穫豈辭貧高寄曾何忤逸民盡質書琴猶賣賦但存藥餌  
取滋身情慵不耐延賓客踵息聊堪養欠伸好待梅花暄且發窺  
園一與酌清真

孤情原不解私圖況是田園雨未蘇三語久曾麾阮掾四方誰可  
覓胡奴魚窮枉作過河泣蝸憊從教挂壁枯閒取咏懷詩數卷朗  
吟飽聽悅妻拏

嘆其隰矣賦何哀焦土誰曾舉耜來下濕瘠還逢螟賊高天堅不  
予龍雷故鄉白馬風聲至新法青苗火急催只恐西塘圖不盡畫

工閣筆一徘徊



天王明聖此何時蒼昊全無雨澤施虜帳未聞移寒上妖氛猶自  
弄潢池郊無可樂容鴻漸子竟誰遺備繭絲每望星辰高共語祥  
桑淥水亦過期

飲王孺文都園宅

日暮江村叩角歌野風淅淅曳寒蘿不堪薄媵乘潮汐幸有高飛  
謝網羅躑躅無心殲石虎崢嶸有夢到銅駝知君久鍊封侯骨肯  
讓桑乾虜渡河

少微此夜燭山堂蟹滿魚肥酒甕香避地如逢秦世隱哀時何諱  
楚人狂曾無丸土封東谷但有輸金徧四方神武自昭天澤解野  
人且勿賦苞糧

寄王崑生藍生兩文學

烏衣伯仲並金莖孔李無忘老步兵遇合問天應示舌文章擲地  
各爲聲十年作賦曾懷鵬二月看花未放鶯尙憶與君先別駕碎

琴沽酒此時情

寄楊直指匏菴

太白樓前江水平  
蛾眉列翠映空明  
爭傳白羽麾風至  
長見青簾疊浪平  
海怪頓無吹霧地  
鮫人亦罷泣珠聲  
野夫一捲蘆花釣  
乘月滄浪自濯纓

寄熊南陵廣生

春穀花繁烟亦深  
聞君訟閣自鳴琴  
璠璣器可登清廟  
杞梓材真出鄧林  
強項未除文士習  
折腰不耐古人心  
左官直道元相對  
酒何爲梁甫吟

寄別盧太湖瞻岵銜恤歸楚

司空烽火照郎星  
四事虔脩百瘁并  
愁絕忍看芳露白  
歸來高臥橘煙青  
不龜妙手無封國  
野鶴孤飛過洞庭  
爲念君山猿叫處  
蒼烟寒水闊冥冥

送張臬使廷掄移淮上

天門江水去悠悠紫氣東行不可留  
俎豆卽看謀畏壘琴書曾不累孤舟  
百城吏有儀型仰三載民無杼軸憂  
欲問使君遺愛地清風明月謝公樓

帝曰漕河屬偉人樓船淮海去振振  
霜輕岬鬱神仙樹春暖冰疏帝子津  
民譽豈能忘召伯君恩終不薄勞臣  
江南節鉞來無暮耆舊何須淚滿巾

柬范質公大司馬

客中門巷又遷鶯桃葉東西可望衡  
家法青山羣笏在君恩黃葉一身輕  
垂簷樹有淮南桂叶夢香滋楚畹英  
好待霜空烟細夜狂來一獻鳳歌聲

送謝司馬苧蘿東還

謫居何地不君恩衡宇相望在白門  
松柏無彫寒歲節江湖贏得



健身存鯨鯢未剪潢池孽蛇豕傳聞薊北屯杼軸已空征歛急交  
慙無力正乾坤

扁舟淮海去悠悠霜草寒烟綰別愁從此聲聞馮朔雁將無去住  
等沙鷗天高梁甫晴雲現日暖之罍晦霧收一酌故園春酒罷相  
期還問鳳皇遊

壽季吏部因是太夫人八十

琅琅婺女散光寒特羨閒居奉母歡冰署臨風長卻鮓瑤池乘月  
每驂鸞藎彰天子曾頒服熊給諸孫舊合丸居近淮陽叢桂樹何  
人不作十洲看

天高沆瀣滿金莖雲裏遙聞鳳管笙玉女每擎瓊盃侍山公親御  
板輿行閒過洞口收花露趺坐樓居聽海聲烟火自慙多俗骨願  
祈纖爪撻方平

送薛千仞還四明

仙人略塵跡出入乘海霞天風吹流鈴來看江南花金陵六代遺  
其俗繁以姤朝逐金彈丸暮騎白鼻騮道心匪所怡栖身入蓬麻  
手疏內景經傍覽掀南華夜窗展明月細字研恒沙讐較無一疲  
坐待晨禽譚

鄉夢越寒潮海峯青欲語遂厭酒樓腥整翮便冲去黃鶴頡頏飛  
歸與浮丘遇爰止天爵堂書琴列森著玉樹日以蕃紫衣復何濾  
親串通殷勤子孫課忠恕擣藥摘芝苗常餐剝山蕨寂寂丁令威  
方君豈能庶

晤戴初士感舊賦

乘桴竟安適不妨都市遊都市饒緇塵孤雲心悠悠寒月挂屋角  
夢到邊海頭冰雪耀川塗立馬風颼颼黃沙無邊岸白骨如山丘  
本無志士懷對此歎不收仰眎鴻雁飛淚下緣纓流詩書恐零落  
田圃無良謀

南州有高士遙躡安道踪閒若宮亭雲秀出香爐峯素志勵松柏  
清辭冒芙蓉上書不得意高臥西山虹著就等身書樽酒頗不空  
盱衡眎天地天地還龍鍾蔚薈誠朝躋狐裘亦蒙茸大言祝鵬雛  
無然感途窮六翮罔不具君其俟培風

憶交水部公初解南宮薜握手如平生相懽略形跡是時國家暇  
屢註朝參籍吟拈淨業香屐破西山碧飲酒連晦明舒嘯裂金石  
不知者曰狂吾各從吾適去此逾廿年人琴感疇昔嶽嶽逢元方  
道故淚霑臆爲問華表松青苔生幾尺烽火徧江臯挂劍安可得  
飲杜弢武將軍清漢山房

馮高當薄暮寒色入孤亭一片江能白六朝山尙青艸蟲吟已歇  
歸鳥翼難停獨有崆峒鶴鳴臯正可聽

解鎮復何事閒傾金叵羅弋鴻向霄漢逐兔過岡坡近挈葡萄酒  
來聽桃葉歌丹丘放吟眺醉尉奈予何



送謝若弓還東

年少趨庭險阻中知君才不愧超宗兩年諷映江南雪千里帆開  
海上虹何羨浮名如項橐莫將奇字讓楊雄願聞車騎淮淝捷一  
慰蕭條犢鼻窮

送楚雄司理陳師來

西南天地外往祀碧雞神不惜狗遐祿聊堪憫老親江花隨遠夢  
蠻草報初春寶井能麾手知君不厭貧  
六詔寬文法平生尙可抒百夷通菡醬重譯至南車蒲海風烟靜  
蒼山瘴癘除晴光看雪嶠萬里映繡書

寄滇中徐方伯紫宿

憶昔相逢花縣前嶽雲隴樹滿秦川至今夢到昆明水不異身寒  
太乙蓮繡脚諸苗輸井稅犬牙各路靖蠻烟知君屏翰清無比天  
半峩峩六詔懸

錦帆幘瑞過江鄉，尙枉高車到草堂。  
行李點蒼峯外雪，起居迦葉定中香。  
巖城報警馮烽羽，儉歲支賓省咏觴。  
何日班荆與炊黍，清平一縱竹林狂。

贈徐若水

天都來枕秣陵雲，闕閣幽栖謝俗紛。  
梅嶼糧嘗儲鶴料，蘭亭墨屢換鵝羣。  
黃花日送柴桑酒，翠葉中翻石鼓文。  
架上圖書梁上榻，竹谿逸不羨諸君。

五嶽烽烟路未通，尙平損益道將窮。  
閒看天印峯頭月，如待長干寺裏鐘。  
不憚盤飴乘小馬，誰云詞賦是雕蟲。  
晚年孤尙將誰托，擬就鄣山百尺松。

寄懷楊斗樞同年

幾年太史輟占星，奇字無從問草亭。  
露下蒹葭叢白白，霜中橘柚葉青青。  
越人無復論甘苦，漁父何須辨醉醒。  
指點寒空無際處，鴻

飛長得遂冥冥

寒聽湖心寺裏鐘  
霜枝霰草氣濛濛  
別來淮水應長碧  
夢路江花復幾紅  
未有雲門尊海鳥  
曾何鉤黨到漁翁  
窮愁贏得身長健  
努力春疇學上農

寄楊南仲

海上雲峯何處青  
知君高臥在玄亭  
健身屢着東山屐  
眞訣傍疏內景經  
笑問隔花何世代  
眼看種樹到滄溟  
遙瞻煙靜潮平夜  
南極冷泠現一星

寒江楚色太微茫  
別後離憂空復長  
閒看區純坑鼠獄  
貧無少伯鱖魚方  
龍湫瀑布千尋雪  
鴈宕雲峯萬點蒼  
緊待來春山氣煖  
來從若士共翱翔

飲酒詩

時運復時運  
奚以埋我憂  
夫子細審度  
不飲誠何謀  
良日潔樽壺



魚鯉烹肥牛廣庭列笙竽陋坐翻吳謳主人紛起舞致詞朝上頭  
天子萬萬歲壽與元會侔鳳皇栖梧桐神龜蓮葉遊臣民扇和風  
胥庭有此否幸甚至矣哉爲君歌優優

人言穢猶種蟹目而蜂鬚長白之獠獍河岔如鰕鮓仙漁昧所守  
聊用躑以嬉譬蝨緣領項窺高不知疲何必具湯沐引指旋喪之  
廟堂布神武雷電疇其媮元老備麟鳳戰士超熊羆犀兕甲千歲  
川岳峙儲精鑒閭夷爲喉東江填爲池杞國有盲夫不辨賢與愚  
無故皇皇然迸淚如蟻珠

送武孝廉素心還秦

斜日金陵樹送君還九嶷雞鳴仙掌月馬飲渭川虹淮泗浮將倦  
甘泉賦更工上林花發日期聽紫宸鐘

友誼追先代居然比斷金秦蘅同契合風木起悲吟天地烽烟滿  
川原雨雪深看君驅馬去寧不一關心

懷徐慶卿表弟

寒山栖影處江鴈送書來懷懷略爲盡鬱陶聊爾開天霜酣頌橘  
野雪炤吟梅林臥高閒甚君無負此杯

風烟今特甚夢路亦艱難但看長干月如君共歲寒家貧從犢鼻  
我貴在漁竿琴裏幽蘭曲山空時一彈

輓楊中丞浴陽

噦噦朝陽振羽儀姓名同挂黨人碑感增曠野遺身處悲動孤城  
罵賊時魯國握拳黃壤坼萇弘化血碧蕪知九京若與鳩鳩遇爲  
道忠邪已列眉

奇字玄亭燬作塵妻孥拮据楚江濱君恩何日求廉吏天道誰云  
福善人兩地雲山懷好友十年雨雪泣孤臣憐予蹤跡渾漂泊挂  
劍無從淚滿巾

與畢貫之夜酌感舊兼訂遊黃山之約

憶昔高秋日囊來匡嶽雲如今霜月下相共禮茅君竹影夢如見  
松風寒亦聞青山各無恙雙鬢雪紛紛

黃海誠尤物聞君曾飽談夢遊三十載尙未一躋探松淨霞開路  
花涼月滿潭誓當從杖履細細踏秋嵐

王式之招飲賦

君謀芝朮我鄉園奇字經時問缺然閒遂引人超苦海貧還有客  
賦甘泉籬門露白藤蘿月草閣燈青橘柚煙此際縱難修禊事咏  
觴不讓永和賢

題杜若冲雪廬卷

凍木寒山雪滿扉廬居歲晏未言歸留田詎釋孤兒恨貞木常看  
子鶴飛寒夜雞栖存剩骨雲中鳥爪見遺暉憐余亦有終天恨掩  
卷爲君淚滿衣

過曾波臣蕉園



閒坐孤亭上悠悠寒汐生盡蠲塵世慮得遂逸人情澹古遙峯色  
蕭疎衆木聲于焉托晨夕眞足睨公卿

清言殊未已暝色逐鴉來竹屋一燈現蘿門片月開野橋烟閉柳  
小塢雪搏梅是際乘高興從君索酒杯

懷廬州鄭太守麟野

風塵金斗鬱相望五馬驂騶攬轡長政教新敷廬子國衣冠重見  
鄭公鄉軍書雜沓雲迷堞訟閣孤清月炤霜更念子遺心欲折畫  
圖曾不讓西塘

白雲吏隱長無事正好銜觴慰旅顏未謂烏亭畫千石居然虎節  
去三山清谿野艇容垂釣寒雪江村自掩關緊待巢湖春水碧扁  
舟來與話高閒

再送楊錦仙明府

金陵把酒思依依野樹晴江望遠暉大道驂騶看騁駕寒空鴻鵠

自高飛軍書是處都傳警諫草如今未可稀但願補天無寸闕野  
人閒探故山薇

答楊文學達可

至日園梅已釀花晴軒炙背憺無譁論文焉敢齊黃絹評紙聊堪  
辦白麻寒渚廻翔矜獨鶴霜林喧寂任羣鴉老兵門巷高閒甚剝  
啄欣來問字車

孤舟小泊石頭霜高屐還來問隱囊淮海風烟連晚歲甘泉詞賦  
有餘香深栖蘿薜調琴旨笑摘梅花拌酒嘗殘月長干鐘可聽期  
君一預竹林狂

寄莫方伯寅虞

柳上萼豐鱸亦肥羨君于此遂初衣文魚脫餌鱗鱗膝霄鶴辭籠  
冥冥飛高枕野雲流磻戶閒觴香雪繞巖扉請從靜裏觀喧啄枰  
局伶場事事非

邦江作客聽啼鶯  
仰紙知君到石城  
自是盧敖耽汗漫  
曾無鬬尹効將迎  
雪消何處尋鴻跡  
江濶偏能隔雁聲  
何日青山共樽酒  
離居一話廿年情

送沈納言炎洲北上

雞黍扁舟釣未寒  
銜盃無處道悲歡  
風烟幾載懷湘竹  
雨露于今到畹蘭  
會看卿雲籠劍珮  
還思野水有綸竿  
補天五色煩媧手  
聖世漁樵亦自安

述懷柬劉中丞蓼生

蕭閒元不慕華予  
古木寒蘿稱隱居  
世事何年靖戎馬  
君恩此日重樵漁  
雲來曲几圍清夢  
雪對高窗炤異書  
但發梅花君過我  
爲浮村釀擊冰魚

問顏若齡病

維摩丈室幾花飛  
門對鍾山晝掩扉  
蠲患可無春兔藥  
交貧何以



策牛衣荒厨臘近糟將熟野圃霜晴菜正肥小閣梅花供繡佛閒來共話法王機

病中謝孩未侍御招飲

閒居罕雜應冀此疾患蠲故人傾美酒要酌霜燈前孤趣抗名嶽清論如寒泉娛我以圖史頓使身心妍于焉動浮想指顧風雲賢鼎食向積薪劍珮趨冰淵六鰲所奠處地漏天且穿祗以與其憂疇能補其偏君言洞大道浩笑因連蜷富貴多苦辛愚賤誠饒便梗楠與樛櫟何者終天年蒙莊欺我哉其然豈其然

懷鄒臣虎

霜月炤空江夢路千里白爲問水部廬梅花可曾坼起居想平善圖書定壅積末俗持澹心寒山著高格鷄鶩方啾啾冥鴻孰能測金陵荒樹中牛衣臥逋客炊黍擊冰魚青蔬可摘乘興當惠來孤舟撥遙汐

述懷柬顧與治徐州來

大道忌紛拏清淨德所宅幾見湫壑中得挂高雲跡自哂顛毛生  
始悟閒居適庭搖衆竹青館抗遙峯碧健戶閱時情微微辨潮汐  
本是江海人甘就禮法縛此夢醒何遲醒矣不復闔據梧長閉門  
杖藜或行藥古木振霜音寒花引閒酌一笑矚高雲羨此遐飛鶴  
賸臘吾從衆豈昧兒女仁冀於酬應減聊使服食親而動制浮俗  
無營尊澹身尙慮梅花發或值樽中貧寤寐誦讀間藉有諸先民  
落日生賴霞烽火在江外野心代天憂無乃杞人罪聖后乘六龍  
羣賢鳳鳴噦彈指臥榻安唾手天山碎狗烹釜罷炊魚苗稅都汰  
請作太平民衡門卽崧岱

一室屏雜務靜覺羣書香耳目亦旣豁日月何其長古人戒苟且  
百撰皆精良大澤蟠龍蛇清廟陳琮璜酌約奉身心無踰此理臧  
日入繕荆薪終夜還琅琅

江田稼不登半粟無一至懲此屢空厄黽勉學農事鉷基而用天  
此理亦應達上帝去蝨賊風雨養嘉穰月白整釣絲原青設媒翳  
謀生茲可兼丈人庶幾庶

卷跡趣彌展獨臥夢始尊超超去塵壻竦體排天門所至鸞鶴嬉  
無復虎豹蹲手攀若木華馮之榮精魂雲中遇青童相顧笑不言  
指我視九州霞腐烟亦昏

天柱副南嶽漢皇此封禪扈從枚馬儔英辭吐星電千載海門賢  
類聚追其絢優游極討論喪亂遂飄散遙遙霧靈青西望淚如霰  
跂予俟河清雅歌紹公讌

答余望之

剡溪有詞客流寓清源東扁舟載圖書鳴夷將無同彩筆凌日觀  
節亦徂徠松今年客冶城顧我蓬蒿中余爲啓柴荆樽酒頗不空  
清言壓晴雪醉貌符霜紅舉觴一相笑笑呵雙玉童一囊負五嶽



霞氣青濛濛

再祝徐衡陽

髯翁捋髯生青虹醉騎黃鶴凌天風吹簫不妨挾秦女縮地將以  
參壺公參壺公歷天姥赤豹離奇彩鸞舞寧能嘯咭如東方長向  
金門啄腥腐余與相逢天台畔烟駕嘲君何汗漫爲摘零星松桂  
枝洞門細煮桃花飯

再寄玉森

松窗山月皎如燭夢見銅官林下梅花間細聞玉女笑冰壺酌我  
眞珠醕酒氣林香醒未散窗月欹斜松影亂破破凍題書問故人莫  
是梅花眞爛熳

柬張少宰赤涵

雲陽寒雁聲噉噉山公高臥梅花間無田可歸賦亦就有雀不捕  
門長閒人生蕭散意云足況是滄桑天地覆爲問夔龍黃閣中何

如巢許青山曲君家鱸魚霜下肥予亦犢鼻縫寒衣何時乘興弄  
遙汐一載香雪衝荆扉

晨起

中夜寐恒覺披衣待鷄鳴本無志士懷汲汲將胡成前園樹蔬菜  
歲儉取當羹雨澤未易希乾土龜坼生苟非灌溉力枝葉何絲榮  
牆東讀書處破屋垂欲傾誅茆而索綯爲結三兩楹僮僕日老懶  
維時屈嘉平夙興課力作孰謂吾無營

留張圖南小飲觀其繪事

拙者臨窮節掩關聊蟄存了無塵事侮彌悟淨居尊霜樹澹扶屋  
寒雲深陰門欣君杖藜至力疾倒山罇

圓神通百卉觸手春風開若有鳬魚戲驚看蜂蝶來輕絲颺碧落  
微毳點蒼苔晴向山窗下摩挲日幾迴

呂君發見訪感賦

栖影寒雲外高春尙掩關巖琴時一撫庭樹與同閒犢鼻聊遵拙  
鴻軒未可攀感君循古處剝啄烏羅間

孤帆自何至飽載石湖霜潮月隨人白寒花雜語香傷心問封樹  
靜眼閱滄桑醉憶西州路離憂對爾長

錢次倩至感賦

片席來天際遙遙共鴈飛聞君弭桂楫一爲啓荆扉鄉井愁將折  
烽烟警未稀短簷寒日下揮淚語依依

末俗何多故思之緒轉紛不如傾美酒相共賞奇文孤嘯標晴雪  
寒林積定雲閒來貪策杖隨意數鴉羣

答余望之以臘八日報恩寺禮塔詩見贈

經言臘八佛成道是日失却參浮屠閉門曝背短簷下暖日藉以  
烘寒枯霜鬢居然野鶴白老影不讓梅花癯丁丁剝啄響蓬戶詩  
來纍纍如完逋漿硯古紙字適放綺思相偈堆珊瑚嗅之蓮香渾



觸鼻如余將子分伊蒲

送趙損之北上

梅花驛路細生香目送飛鴻別思  
巖夢詎甘詢小草春風正可  
賦長楊繞朝策欲騰天闕諫獵書看入露章從此琮璜收氣色須  
君寶璧薦輝煌

張深之納姬

畫眉煖閣結流蘇絳蠟光中雒浦圖  
璫管爭調秦內史香車不避  
執金吾豔生小婦釵頭螭樂奏詞人曲裏烏  
煩典鸛鷀裘換酒老兵醉欲倩人扶

柬光含萬

庭雪炤身心澄暉有如此養痾臥牛衣百慮孰能滓故人客蕭寺  
孤琴挾巴水金陵三五夕峨嵋千萬里手攜江月來寒光動行李  
魚鳧方鼎沸海棠香未已美錦罕寸缺將以報天子念當及暄和

微疴冀蠲止黽勉奉山樽闊懷接芳芷

沈文學孚中投以諸詩詞因招集賦贈

庭有上古雪炤我高閒心澄暉漾巖戶寒籟喧松岑擁絮短簷間  
山酒聊自斟君從梅花隙寄我瓊華音宛然五雜組不異雙南金  
天外倚長劍風前鳴玉琴感君尋轅鼻爲君繹龍吟妙麗而清揚  
其旨高復深

野雪耀川塗孤舟滯江次未若坐高館櫺櫓煮奇字門雀啾啾鳴  
杖藜君已至上堂攬鵷裘交談挾鴻祕君才壓江濤秋聲撼天地  
復如兩高雲舒卷向晴翠平生明聖湖遊目未嘗肆觀面接清音  
廓然通大義使余枯澹心墳起不能置華月暈水輪空香裊清吹  
相感在虛無笑共梅花醉

奏公亦九兩表弟遊泮後相顧感賦

孤舟撥寒汐遙集古人心抵岸雪已厚到門雲更深兆難虛宅相

香復接儒林、兩姓梧捲感看君淚滿襟、



讀阮大鍼詠懷堂詩集

胡先驕

吾國自來之習尙卽以道德爲人生唯一之要素故武樂蒙盡美未盡善之譏孔子復有雖有周公之才之美使驕且吝其餘不足觀之語此種習尙固足以鞏固人類道德之精神然有時藝術界乃受其害嘗讀宋孫覲之鴻慶集觀其詩精嚴深秀誠有宋之作家然明嘉靖間常州欲刻其集邑人徐問以其曾誌万俟卨之墓竟有覲有罪名教其集不當行世之言事以遂止此外大奸慝如嚴嵩趙文華輩皆文學巨子今日讀鈴山堂集者能有幾人若趙文華竟鮮有知其能文者矣又如明末南都權相馬士英人但知其奸而鮮知其能文然觀其序阮大鍼詠懷堂丙子詩乃自舉其「深機相接處一葉落僧前」之句則知此公不但能詩且深研內典也阮集之以佞倖小人始則首鼠魏黨東林之間卒爲東林所斥而列名逆案繼乃乘南都福王之立阿附權相汲引僉壬芟鋤

正士南都覆亡後復降清室終于走死遂爲士論所不齒遺民所  
腐心其能文之名因之亦泯終滿清二百八十年之際除燕子箋  
春燈謎兩傳奇外殆無人能舉詠懷堂詩之名者矣其集旣未爲  
四庫所收士君子復深鄙其人世間遂少流行之刻本溧水王伯  
沆先生幾費心力始克繕集其內外集共四巨冊然祇止於戊寅  
前歲丹徒柳翼謀先生復在舊書肆購得其辛巳詩一冊阮詩之  
存於天壤間者殆具於是以有明一代唯一之詩人之遺集乃幾  
於沒世不稱不可謂非世間文化之一大悲劇也

欲知詠懷堂詩在中國詩界中之位置不可不知中國詩之源流  
嘗考中國詩自周秦以降卽分人文與自然兩派若三百篇十九  
首蘇李阮鮑李杜元白韓孟歐王蘇黃陳後山陳簡齋陸劍南楊  
誠齋下逮晚清鄭子尹陳伯嚴鄭太夷諸詩人皆屬於人文派若  
屈原陶謝王孟韋柳儲光羲賈島姚合林和靖范石湖姜白石嚴

滄浪趙師秀徐照徐璣翁卷輩皆屬於自然派前派之詩以人事爲重故無論達爲顯貴窮爲寒儒皆以家國盛衰人民疾苦爲念其倫紀之情亦極篤故每能爲深至怛惻之音而稀有遺世獨立之概後派之詩則忽視人事常懷騫舉出塵之思爲之者常稟冰雪之質沖曠之懷以隱逸爲高尚薄功業如浮雲一若大塊勞生光陰逆旅者二者之人生觀截然不同其詩之韻味亦以迥異詠懷堂則自然派之子裔也觀其與楊朗陵秋夕論詩句云「時尙奚足云所嚴在古昔齋心望雲天柴桑如可卽（中略）天不生此翁六義或幾息厥後王與儲微言增羽翮（中略）異代唏髮生冷泔瀨中石（中略）舍是皆泐沮偶匯亦溝洫勝國兼本朝一望茅葦積滔滔三百年鴻濛如未闢」可知其所推許者三百篇外厥爲陶王儲謝數公心目中且無李杜蘇黃尙何餘子之足云雖持論不無稍苛然其宗旨可知矣



詠懷堂詩在自然派詩家中別樹一幟吾嘗遍讀陶公及王孟韋柳諸賢之詩雖覺其閒適有餘然尙稍欠崇拜自然之熱誠如英詩人威至威斯之「最微末之花皆能動淚」之精神在陶韋諸賢集中未嘗一見也如陶公歸田園居飲酒孟襄陽秋登蘭山寄張五宿業師山房待丁公不至登鹿門山懷古夜歸鹿門歌王右丞送別青谿渭川田家輞川閒居贈裴秀才廸酬張少府過香積寺終南別業儲光羲田家即事田家雜興張谷田舍韋蘇州幽居曉坐西齋游龍門香山泉籓寂觀西澗瀑布下作月谿與幼遐君貺同游柳柳州晨詣超師院讀禪經南礪中題與崔策登西山構法華寺西亭溪居諸詩或詠山水之勝或述田家之樂皆爲集中之精粹而最能代表作者之思想者然皆靜勝有餘玄驚不足且時爲人事所牽率未能擺落一切冥心孤往也惟詠懷堂詩始時能窺自然之秘藏爲絕詣之冥賞故如「春風鮮沉冥齊心難與味」

「林煙日以和衆鳥天機鳴澤氣若蠕動瘁物亦懷榮」「息影入  
春煙形釋神亦愉」臥起春風中百情皆有觸「春風蕩繁圃孰  
物能自持人居形氣中安得不因之」山夢自難繁嵐翠警空想  
卽此寓覺因矧復風泉響「飲此青翠光使我心顏醺」眺聽將  
安著山川若始生「水煙將柳色一氣綠光浮坐久領禽語始知  
非夢游」隱几澹忘心懼爲松雲有「息機入空翠夢覺了不分  
靜抱虛白意高枕鴻濛雲」等詩句非泛泛模範山水嘯傲風月  
之詩人所能作也甚且非尋常山林隱逸所能作也必愛好自然  
崇拜自然如宗教者始克爲之且不能日日爲之必幽探有日神  
悟偶會「形釋」「神愉」「百情有觸」時始能間作此等超世之語  
也卽在詠懷堂全集中亦不多見他人可知矣

至於寫景之佳句幾於美不勝收而要能以閒淡之筆寫空靈之  
境如「花葉沐已齊晴鳥紛我園竚立始有悟任運良可尊」辨

葉歛旁眺因香縱恬步湖風弄微寒果兆夜來雨蕭蕭春竹鳴高  
館更成趣「霽心與定氣馮之酌終古自昔邈何獲在我恬有取  
」空翠感微息定覽簪殊狀葉並遠帆驚鳥習天花漾山樽給永  
日清言副靈貺「懷音達鐘界飲光坐霞廡煙定羣峯開林缺江  
帆舞遂覺性情逸彌惻塵襟苦」微步歷禽上清言滿松聽泉幽  
滴春脈林貞抱秋影澄鮮入何際空明轉遺境「蘿葛翳山窗夢  
境亦沈邃覺聞松際禽始悟晨峯翠」山氣生夜涼蕭機革塵侮  
明燈草蟲次彌覺清言膺倦至歇琴樽支枕向終古「古壑寓聲  
聞諸峯侍云動空翠如有人香端轉孤誦」淡月寫空水微煙綿  
夕林於此理閒機愴然生遠心「山翠旣虛無月氣殊微茫奉身  
入清機耳目非故常」感此香光氣彌澄虛白心「秋山鐘梵定  
諸感觸無幾」澹游如閱夢空慮直賓煙「眞機滿山夜梵止草  
蟲鳴卽境已忘辨觀心無可清」視聽一歸月幽喧莫辨心「孤



峯超夢界幽磬闋靈聞「屏居成獨坐池水與心清林月自然至  
塵機何處生」諸句皆能超脫物象別具神理除微嫌烹鍊外要  
可抗手王孟俯視儲韋卽集中尋常寫景之句如「村煖杏花久  
門香湖草初」蘿雨靜可數閭巷如空山「孤船倚山翠木葉靜  
可數微風入清夜海月漸遙舉」草暝氣亦和空翠自成露「潭  
定藻影開月白蟲吟廣」炊煙冒嵐影旅夢接山雲「竹疏山氣  
透荷近稻香分」林空聞露響潭曙識星飛「立渚見恬鶴爭煙  
聞亂鳥」已非姚合許渾所易辦尋常作者偶得之即可自詫爲  
得神助者也至若「放心浩劫外置眼無生前」塵累盡唐捐空  
明入非想「喧寂了非我平等旨奚二」曾謂遺物淺不知應化  
深「等句則非精研內典確有心得之人不能道王右丞尙有不  
逮若蘇長公黃山谷之僅以佛語裝門面者尤無論矣

之詩人除陶靖節王右丞儲侍御三家外所亟稱者厥爲謝晞髮  
實則晞髮集詩雕鏤瓌詭取徑長吉近體則時參少陵與陶王異  
趣然阮集之稱許若是者或賞其琢句用字之工也晞髮集中詩  
句如「月離孤嶂雨尋夢下山川」「水生溪榜夕苔臥野衣春」  
錫聲歸後夜琴意滿諸峯」「窟泉春洗屐氎雪暮過樓」「澗響夜  
疑雨雲寒春欲層」「鳥宿溼棲樹花流晴下溪」等皆新馬瓌奇  
雖理致視詠懷堂詩爲遜然確爲其宗派也嘗考中國之詩其精  
神固如上文所述分人文與自然兩派其技術又可分清淡平易  
與生澀雕鏤兩派如晉宋之陶謝唐之王孟韋柳宋之陳簡齋范  
石湖姜白石嚴滄浪以及永嘉四靈前派也唐之韓愈孟郊盧仝  
李賀宋之梅聖俞黃山谷陳後山謝皋羽後派也惟詠懷堂詩則  
稟王孟之精神副以黃陳之手段故倍覺過人亦猶清末詩人鄭  
子尹之巢經巢詩以黃陳之手段傳以元白之面目亦遂開一前

此詩家未有之體格總觀詠懷堂集中天機獨擅不假雕飾之句  
如「乍聽柴扉響村童夜汲還爲言溪上月已照門前山」「湖風  
弄微寒果兆夜來雨」「潭影澹相照松風幽自吹」等雖屢見不  
鮮然非能代表其體格者至如「辨葉斂傍眺因香縱恬步」「磅  
礴意有得沉冥理非誤初葉一禽轉輕颺數花驚」「警蘿若開笑  
追香宛迷杖」「懷音達鐘界飲光坐霞廡」「危步歷禽上清言滿  
松聽泉幽滴春脈林貞抱秋影澄鮮入何際空明轉遺境」「象緯  
關睇笑草木感沖菑湖光澄遠心峯霞蔭華撰」「夕鳥銜情入秋  
花質影同」「天花雜萼飯空翠警書聲」「百藥延春氣羣峯侍法  
筵澹游如閱夢空慮直賓煙」「幽人卽芳草宵語若深山」「無言  
山磬傳空翠晏坐松燈照石泉」「據梧盡日曾無夢動操羣峯各  
領聲」等詩句則極雕鏤肝腎之能事大非王孟儲韋之所習爲  
矣苟明眼人不爲外貌所欺則可見其與孟東野黃山谷同一谿



壑此其所以稱美謝皋羽之故亦即詠懷堂集所以出奇制勝之處也

自諸體言之詠懷堂所最工者厥惟五言古與五言律五言古詩閑整以暇極得陶王韋柳之神理五言律詩天機完整一氣呵成尤得王孟之神髓其四言古詩導源三百篇古趣盎然頡頏漢魏佳句如「令儀干岳澄思懷淵行芳氣潔式則幽蘭」「纖月虛徐秋花如煙」「羣龍入谷潛躍欣同亦有不速鸞車雖離班荆蔣食力拯頽風」「臨觴不樂日月彌晏停雲崇阿播芳南澗龍蟄匪存鳳衰何諫」皆雅頌之遺魏晉以還文人斂手者惜篇幅不多耳至於七言則非所長七言古詩真氣薄弱內美不充馳驟竭力故每有辭勝於意之嫌雖佳句如「恬從秋水照吟魂饑向青峯質危語」「不將淺籟接清哦肯弄凡煙格玄對」仍清雋絕倫然佳篇極稀五七言古詩之差別幾不可以道里計誠異事也七言律

詩大體仍七子之舊格惟知鋪排一無深語雖佳句如「高咏各  
師寒歲雪初衣交摩六朝雲」「鉢影尚涵將曉月經行時觸未歸  
嵐」「盡日經行空翠裏一春調息雨聲中」「江樹春紅村雨足露  
杭秋碧晚煙和」者亦屬屢見不鮮然完整可誦之篇頗少殊非  
五言律詩之滿目琳琅者可比也七言絕句非作者所措意一時  
興到雖有佳作亦不足爲大觀可不置論

夫兼覽衆長本非易事老杜而外各體皆能名家者本不數觀阮  
集之能以五言擅長已非易事固無庸苛求也雖然詠懷堂詩實  
質上乃有根本大缺點焉卽天性不足是也總阮氏之一生觀之  
生有異稟才力過人自無疑義然迹其阿附權奸傾陷正士之行  
爲可知其絕無道德觀念彼身丁明季目擊時艱在有志之士方  
且疾首腐心之不暇而彼仍嘯傲山水寄情風月極其自得觀其  
集中憂天憫人之辭百不一見卽可知其人德性之薄弱矣其感

時之作有己未春感遼事四律丙子空城雀一七古秋雨臥病感  
時事四律戊寅賦答劉赤存以聞虜警詩六律聖羽避亂至山盡  
談樅川被賊之狀二律皆無一二自肺腑中流出之語但撫拾陳  
言排比題意而已卽其私恩察之戚鄰友朋之間亦無深至之言  
卽其歸次詠懷堂哭先恭人一詩前半亦儘知鋪叙景物沈痛之  
語僅「一身等飛藿百念頓攢戟長號安可持淚與莓苔碧」四  
語至春寒感懷先恭人一詩前六韻所言者皆春寒惟末一韻憐  
無慈母縫使我中懷傷」十字始有感懷先恭人之意然語意極  
其淡薄其雨中憶家大人子處先慈殯室并以紀人道人心之變  
未有甚於此時者二律訖無些須哀音其天性之涼薄於茲可見  
又阮氏雖酷愛自然然非甘於棲遯者苟真欲終老山林則巢許  
高蹈志焉可奪旣承休命則宜以社稷民生爲重烏可仍懷肥遯  
之思觀其崇禎元年出山詩句云「飭彼車上巾愧此籬間笠婉



詞別農圃菊松煩代葺行頌天保章即庾考槃什秋色佳千峯期  
與歸雲入」辭雖極佳然不立其誠精采已失又如「誰謂謠諠  
言非我息機具（中略）采薇兼采芝長謠入煙霧向謂不近情今  
始達其故」歲月遂爲林壑有雲山安得是非存」于時誠足嘲  
大隱亦鄰欺惟與鸞俱伏方令鶴不疑」但使榆關銷轉鬪何妨  
花塢有深耕」等句非不貌爲恬退然迹其行事則知其熱中實  
不亞一般之羣小此所以讀其詩終覺其言不出衷而其詩之價  
值亦因之而稍貶也

雖然孔雀有毒文采斐然嚴格苛求亦非批評之責才人無行屢  
見不鮮我國文士自魏武以下如宋之問沈佺期儲光羲盧仝李  
義山溫飛卿馮延巳柳耆卿孫覲嚴嵩之流亦復甚衆然不聞因  
噎廢食束其書而不觀則吾人之讀詠懷堂詩亦但賞其靈芬孤  
秀闡發自然界祕奧之作可耳陳散原先生稱其詩爲五百年所

未有夫能冠冕明清二代之作家寧無獨擅之長是在有目者所  
共賞已

詠懷堂詩集跋

此書都十卷並據阮氏自刊本校印原刻詠懷堂詩集四卷外集二卷丙子詩一卷戊寅詩一卷舊藏丁氏八千卷樓今在益山圖書館辛巳詩二卷則余遊書肆得之茲爲合印以備談藝嗜奇者之求至弘光時詩不知尙有刊本否也大鍼當天啓中與左魏諸公構釁名在璫案終莊烈帝世廢斥十七年葉序稱其里居以來蕭然無一事惟日讀書作詩以此爲生活是集所載蓋皆其窮居屏處焮精壹力之詣也大鍼曾大父鶚從祖自華皆有才學而不軌於正鶚從歐陽南野游王學支裔也而盜虛譽以貪墨敗詳明史胡宗憲傳自華偃蹇駘蕩仕輒不得志見錢謙益列朝詩集小傳至大鍼遂爲有明一代奸臣之殿得罪名教隕首巖石其亦家世賦遺然歟自華自謂其詩超于鱗而上之且詔大鍼卓出獨樹自致千古葉序稱堅之先生郡中推才子古人無兩亦心折公門



下問字者接踵輒曰益往質吾家勳卿是其詩亦本自華教融怪特之性而歸于冲雅濡染有自宜其異常也大鍼詩之途徑既見于自序其論陶詩謂靖節蕭機玄尙直欲舉大風柏梁短歌公宴漢魏間雄武之氣一掃而空之以登于考槃北門之什似離騷歌辨亦在然疑出入中易世而有惘川太祝京兆三子者又能變化以廣其意令從陶入三百功力倍取資博而意象更覺日新則後起羣賢不可不勉其自期待者夔矣然史傳第稱大鍼機敏賊猾有才藻削其詩不登藝文志錢謙益故嘗阿大鍼僅錄其詩七首初非其極詣亦不加評騭朱彝尊明詩綜不載大鍼姓字附論于李忠毅詩前曰僉壬反覆真同鬼蜮雖有詠懷堂詩吾不屑錄之以故清代藏書家于其詩率鈔著錄烏虜名節之視文藻顧不重耶抑余讀夏存古續幸存錄論圓海事一則曰阿璫亦無實指再則曰阮之阿璫原爲枉案且謂持論太苛釀成奇禍不可謂非君

子之過夫以東林子弟躬受大鍼荼毒者而爲恕詞若此使大鍼  
丁甲申之變終已不出讀其詩者挹其恬曠之致于品節或益加  
恕焉未可知也然則君子之于小人固不可疾之已甚而負才怙  
智不甘枯寂積苦摧挫妄冀倒行逆施以圖一逞卒舉其絕人之  
才隨身名而喪之者良足悲已戊辰五月柳詒徵

民國戊辰國立中  
央大學國學圖書  
館印行翻印必究





勘誤表

詩集序

頁

行

誤

正

一

一

一四

曆

歷

二

一

六

腫胝

腫胝

二

一

九

吹

飲

詩集卷一

一

八

祇

祇

一

十八

執

執

卷二

四

二二

驚

驚

四

三三

瞑

瞑

五

四

埋

理

八

九

穎

穎

九

一四

啜

啜

九

一七

島

島

詠懷堂詩

勘誤表

益山精舍



卷四

外集甲部

外集乙部

詠懷堂詩

勘誤表

五	四	三	二	一	二二	二〇	一八	一七	一一	五	四	二三
二二	二	一〇	二四	二二	一	一六	二三	二二 二五	二二	二〇	九	五
蕭	鋌廻	上	印	古	會	貴	化	邃	藥	暝	疏水	沾
蕭	廻鋌	王	印	占	曾	賁	花	邃	藥	暝	蔬水	沾

一  
二  
一  
蓋  
山  
精  
舍





丙子詩卷上

二六

一

相

想

二八

二四

簾

簾

二九

九

骨

肯

三一

二四

錦貂瘞

錦貂盡瘞

三三

八

目還努

目還努

三三

一八

枯槁

枯槁

九

七

魚深

魚梁

一三

二六

箕穎

箕穎

一七

二

僧

僧

戊寅詩卷下

一

一一

長干

長干

五

一五

高詠

高詠

五

一七

藥

藥

七

二二

垣錯

恒錯

辛巳詩卷上

一〇

一三

影息

息影

一二

四

栽

栽

一六

九

叫

叫

二

一八

江籬

江籬

四

一九

爨

爨

七

六

口

義

一三

口口口

扁舟煩

一一

一二

楊子潮

揚子潮

一三

二

自卿

自勛卿

一八

一六

爲

謂

二六

二五

臆

應

辛巳詩卷下

八

一四

柏

柏

一

一〇

賢

賢



跋

六

一三三

迄

訖

一四

七

先民

先民

人道

世道

YORK UNIVERSITY

MAY 15 2001

EAST ASIAN STUDIES

每部定價洋三元







廣東刊本  
懷麓堂  
五元式五

路明文市州廣

